

續
文
獻
通
考

續文獻通考卷之一百十

皇明進士雲間王圻纂輯

郊社考 告祭至雜祠

告祭禡

宋

寧宗嘉定十四年以立皇太子告于天地宗廟社稷又奉安玉璽於天章閣命近臣告於天地宗廟社稷 十七年以皇帝登寶位告于天地宗廟社稷宮觀諸陵

理宗寶慶三年以奉上寧宗皇帝徽號冊寶告於天地宗廟社稷宮觀 紹定四年以火災告于天地宗廟社稷 端平元年以金國滅亡奏告宗廟社稷 嘉熙三年

以潮患告於天地宗廟社稷宮觀 淳祐五年以禱雨
奏告天地宗廟社稷宮觀 寶祐二年以明堂大禮奏
告天地宗廟社稷又以皇子忠王加冠禮命從臣詣景
靈宮奏告天地祖宗 五年以並侑高宗皇帝奏告天
地宗廟社稷 開慶元年以邊事孔棘命群臣奏告天
地宗廟宮觀岳瀆諸陵 景定元年詔以邊事肅清命
元祈禱官各詣致謝 以明堂大禮奏告天地宗廟社
稷宮觀 又以冊立皇太子奏告天地宗廟社稷宮觀
四年以明堂大禮奏告天地宗廟社稷宮觀

遼

其制皇帝親征將出師必先告廟乃立三神王祭之曰先

帝曰道路曰軍旅刑青牛白馬以祭天地其祭常依獨
樹無獨樹即所舍而行之或皇帝服介冑祭諸先帝宮
廟乃閱兵將刑牝牡麋各一爲禴祭將臨敵結馬尾祈
拜天地而後入下城克敵祭天地牲以黑白羊班師以
獲牲馬牛各一祭天地出師以死囚還師以一謀植柱
縛其上於所向之方亂射之矢集如蝟謂之射鬼箭

太祖元年正月命有司設壇于如迓王集會塙燔柴告天
即皇帝位 天顯元年正月以降渤海王諲饌祭告天
地 八月皇子述律生告廟

太宗大同二年以出師雲中告天地又命大內惕隱告出
師于太祖行宮 十二年正月以南援石敬瑭立爲帝

告功于太祖行宮

穆宗應曆九年十二月祀天地祖宗告逆黨事敗

景宗乾亨二年十月以將南伐命巫者祀天地及兵神又祭旗鼓

聖宗統和四年三月以親征宋告陵廟山川 四月以休哥伐宋捷酒脯祭天地又以復涿州告天地 七月以伐宋捷告天地 十六年五月祀木葉山告來歲南伐天祚帝乾統二年十一月以受尊號告廟

遼人常行柴冊禮其儀擇吉日前期置柴冊殿及壇壇之制厚積柴以木爲三級壇置其上席百尺毼龍文方茵又置再生母后搜索之室皇帝入再生室行再生禮

早八部之叟前道後隨左右扶翼皇帝冊殿東北隅拜
日畢乘馬選外戚之老者御皇帝疾馳仆御者從者以
氊覆之皇帝詣高阜地大臣諸部帥列儀仗遙望以拜
皇帝遣使勅曰先帝升遐有伯叔父兄在當選賢者冲
人不德何以爲謀群臣對曰臣等以先帝厚恩陛下明
德咸願盡心敢有他圖皇帝令曰必從汝等所願我將
信賞必罰爾有功陞而任之爾有罪黜而棄之若聽朕
命則當謀之僉曰惟帝命是從皇帝于其地封土石誌
之遂行拜先帝御容宴享群臣翌日皇帝出冊殿護衛
太保扶翼升殿奉七廟神主置龍文方茵北南府宰相
率群臣環立各舉瓊邊贊祝訖樞密使奉玉寶玉冊入

有司讀冊訖樞密使稱尊號以進群臣三稱萬歲皆拜
北南院大王諸部帥進赭白羊各一群皇帝更衣拜諸
帝御容燔柴祭天遂宴群臣賜賚各有差行告廟儀
至日臣僚昧爽朝服詣太祖廟次引臣僚合班先見御
容再拜畢引班首左上至褥位再拜贊上香揖欄內上
香畢復褥位再拜各祇候立定左右舉告廟祝版于御
容前跪捧中書舍人跪讀訖俛興退引班首左下復位
又再拜分引上殿次第進酒三分班引出

金

太宗天會元年正月即皇帝位告祀天地三年七月幹
魯以遼主至京師告於太祖廟

海陵貞元四年正月上尊號前三日遣使奏告天地于常
武殿拜天臺設褥位昊天上帝居中皇地祇居西少却
行一獻禮

世宗正隆六年十月官屬勸進親告於太祖廟即帝位
大定七年正月十一日上尊號前期三日命皇子許王告
天地英王告太廟 十四年三月十七日詔更御名命
左丞相良弼告天地平章守道告太廟右丞相石琚告
昭德皇后廟禮部尚書張景仁告社稷及遣官祭告五
嶽

章宗明昌六年五月以出師遣禮部尚書張暉告于廟社
衛紹王大安元年四月徐邳州河清五百里告宗廟社稷

宣宗貞祐四年三月以將修太廟遣李革奏告祖宗神主
于明俊殿 興定三年十月以慶雲見遣官告太廟
告天地儀 大定時先於舊拜天處設昊天上帝位當
中南向皇地祇位次西少却並用坐褥位牌及香酒脯
簍等祝版三學士院撰祝文書寫訖進請御署訖以付
禮部移文宣徽院并差控鶴官冊案昇覆以黃羅帕隨
所差告官詣祝所前一日告官等就局官致齋一日告
日質明宣徽院太常寺鋪設位具如儀閣門舍人一員
太常博士一員引告官各服以次就位禮官舍人稍前
贊有司謹具請行事贊者拜在位者皆再拜禮直官先
引執事官各就位舍人博士次引告官詣盥洗爵洗位

北向立搢笏盥手帨手洗爵拭爵詣酒尊所搢笏執爵
司尊者舉奠酌酒告官以爵授奉爵酒官執笏詣昊天
上帝皇地祇神位前再拜每位三上香跪奠酒訖以爵
授奉爵官執笏俛伏興舉祝官跪舉讀訖俛伏興告官
再拜告畢引告官以下降復位再拜訖詣望燎位燔祝
版再拜半燎告官以下皆退 告廟儀 凡皇帝即位
加元服受尊號納后冊命巡狩征伐封祀請謚營修寢
廟諸有大事皆告或一室或徧告及原廟並獻一禮用
祝幣皇統以後凡皇帝受尊號冊皇后太子禘祫升祔
奉安奉遷等事皆告郊祀則告配帝之室其儀注前期
二日太廟令掃除廟內外設告官以下次所前一日行

事官赴祀所清齋告日前丑刻禮直官引太廟令帥其屬入殿開室戶掃除鋪筵設几于北牖下如朝享儀禮直官帥祀祭官陳幣篚于室戶之左陳祝版于室戶之右案上及設香案祭器皆藉以蒲席每位各左一籩實以鹿脯右一豆實以鹿臠犧尊一置於坵加勺霽在殿上室戶之左北向實以酒每位一瓶設祝于神位前又設盥爵洗位橫街之南稍東設告官褥位於殿下東階之南西向餘官在其後稍南又設望燎位於西神門外之北告日未明禮直官引太廟令太祝官闐令入當階間北面西上立定奉禮贊再拜訖升自西階太祝官闐令各入室出神主設於座如常儀次引告官入就位禮

直官稍前贊有司謹具請行事又贊再拜在位者皆再拜訖禮直官引告官就盥洗位盥手訖詣神位前搢笏跪三上香執事者以幣授奉禮郎西向授告官告官受幣奠訖執笏俛伏興退就戶外位再拜詣次位行禮如上儀訖降復位少頃引告官再詣爵洗位讀祝舉祝官從後至位北向立搢笏洗爵拭爵訖授執事者執笏詣酒尊所西向立執爵執尊舉釁酌酒告官以授執事者詣神位前北向搢笏跪執爵三祭酒執笏俛伏興退就戶外位北向立俟讀祝文訖再拜詣次位行禮如上儀訖與讀祝官皆復位禮直官贊曰再拜在位者皆再拜次引告官以下詣望燎位執事者取幣帛祝版置于燎

禮直官曰可燎半柴禮官贊禮畢告官以下退署令闔廟門瘞祝于坎

元

憲宗戊午歲冬十一日

世祖未即位

伐宋禡于開平東北是日

啓行

七年夏六月謁太極行宮祭旗鼓

至元十年

以皇后皇太子受冊寶遣太常卿合丹告于太廟七月

以修太廟將遷神主別殿遣張文謙等祭告

十二年

以受尊號遣使預告天地下太常檢討唐宋金舊儀于

國陽縣正門東南七里建祭臺設昊天上帝皇地祇位

二行一獻禮自後國有大典禮皆即南郊告謝焉

十

三年以平宋遣官告天地祖宗于上都之近郊

十五

年六月太廟殿柱朽腐命太常少卿伯麻思告于太廟
乃易之 十六年二月命李居壽告祭新歲 二十三

年九月以太廟兩壞遣龔吉刺帶致告奉安神主別殿
成宗即位爲壇於都城南七里遣司徒率百官爲大行皇
帝請謚南郊爲告天請謚之始 大德七年以立皇太子遣告昊

天上帝及太廟 十一年武宗即位遣御史大夫即南

郊告謝天地主用栢素質黑書爲即位告謝之始

武宗至大三年以皇后受冊遣官告謝太廟 甲子以上

皇太后尊號告祀南郊及太廟

仁宗皇慶元年以即位告天地於南郊及太廟 延祐二

年二月甲子以皇后受冊寶遣官告祭天地於南郊及

太廟 三年以立皇子告于天地宗廟社稷 六年八

月甲午以授皇太子冊寶告祭于南郊及太廟 七年

英宗未改元 以即位告祭于南郊社稷及太廟

泰定帝即位遣使至大都告天地宗廟社稷 泰定元年

遣官攝祭南郊及太廟以冊皇后太子告 致和元年

時文宗攝位 周王和世㻋即帝位遣左丞相鐵木兒補化攝

告即位于郊廟社稷

文宗天曆二年以冊命皇后告於南郊及宗廟 至順元

年以受尊號告祭南郊 三年八月寧宗即位以即位告祭

郊廟及社稷又以上皇太后玉冊告祭郊廟

順帝元統二年以上寧宗皇帝謚號告祭南郊又以太廟

木陛壞遣官告祭 至元元年以上皇太后冊寶遣官
告祭天地及太廟 又以太皇太后玉冊玉寶成遣官
告祭於太廟 至正三年以將祀南郊告祭太廟 十
三年以立皇子告祭天地宗廟 十五年以郊祀命皇
太子祭告太廟

祭告天地三獻儀 告前三日三獻官諸執事官具公
服赴中書省受誓戒前一日未正二刺省牲器告日質
明三獻官以下諸執事官各具法服禮直官引監祭禮
以下諸執事官先入就位立定監祭禮點視陳設畢復
位立定太官令率齋郎出禮直官引三獻司徒太常禮
儀院使光祿卿各就位立定禮直官贊曰有司謹具請

行事降神樂作六成止太常禮儀院使燔牲首復位立
定奉禮贊三獻以下皆再拜就位禮直官引初獻詣盥
洗位盥手訖陞壇詣昊天上帝位前北向立搢笏跪三
上香真玉幣出笏俛伏興再拜訖降復位禮直官引初
獻詣盥洗位盥手訖詣爵洗位洗爵拭爵訖詣酒尊所
酌酒請詣昊天上帝神位前北向搢笏跪三上香執爵
三祭酒于茅苴出笏俛伏興俟讀祝訖再拜平身請詣
皇地祇酒尊所酌獻並如上儀俱畢復位禮直官引亞
獻並如初獻之儀惟不讀祝降復位禮直官引終獻並
如亞獻之儀降復位奉禮贊賜胙衆官再拜在位者皆
再拜禮直官引三獻司徒太常卿光祿卿監祭監禮等

官請詣望燎位南向立定俟王幣祝版禮直官贊可燎
禮畢

祭告天地一獻儀 告前二日郊祀令掃陰壇壇內外
翰林國史院學士撰寫祝文前一日告官等各公服捧
祝版進請御署訖司御香上尊酒如常儀迎至祠所齋
宿告日質明前三刻禮直官引郊祀令率其屬詣壇鋪
筵陳設如儀禮直官二員引告官等具紫服以次就位
東向立定禮直官稍前曰有司謹具請行事贊者曰鞠躬
拜興拜興平身禮直官先引執事官各就位次詣告
官前曰請詣盥洗爵洗位至位北向立曰搢笏盥手悅
手洗爵拭爵出笏詣酒尊所曰搢笏執爵司尊者舉幕

曰酌酒良醞令酌酒曰以爵授執事者告官以爵授執事者曰出笏詣昊天上帝皇地祇神位前北向立稍前曰搢笏跪三上香三祭酒以爵授捧爵官曰出笏俛伏興舉祝官跪曰舉祝讀祝官跪曰讀祝讀訖舉祝官奠祝版于案俛伏興告官再拜曰鞠躬拜興拜興畢身引告官以下降復位禮直官贊曰再拜鞠躬拜興拜興平身詣望燎位燔祝版半燎告官以次皆退座於祭所告祭社稷之儀告前三日三獻官以下諸執事官各具公服赴中書省受誓戒告前一日省牲器告日質明三獻官以下諸執事各服其服禮直官引監祭監禮以下諸執事官入自北牖下南向立定奉禮郎贊曰再拜

在位官皆再拜訖奉禮郎贊曰各就位立定監祭監禮
視陳設畢復位立定禮直官引三獻司徒太常卿光祿
卿入就位立定禮直官贊有司謹具請行事降神樂作
八成止太常卿瘞血復位立定奉禮贊皆再拜訖禮直
官引初獻官詣盥洗位盥手訖詣社壇主位神座前南
向搢笏跪三上香奠主幣執笏俛伏興再拜詣配位神
座前西向搢笏跪三上香奠幣執笏俛伏興再拜訖詣
稷壇盥洗位盥手訖升壇並如上儀俱畢降復位司徒
率齋郎進饌奠訖降復位禮直官引初獻官詣盥洗位
盥手訖詣爵洗位洗爵訖詣酒尊所酌酒訖詣社壇神
位座前南向立搢笏跪三上香執爵三祭酒於茅苴爵

授執事者執笏俛伏興俟讀祝官讀祝訖再拜興詣酒
尊所酌酒訖詣配位神座前西向搢笏跪三上香執爵
三祭酒干茅直爵授執事者執笏俛伏興俟讀祝文訖
再拜興詣穆壇盥洗位盥手洗爵酌獻並如上儀俱畢
降復位禮直官引終獻並如亞獻之儀俱畢降復位太
祝徹籩豆訖奉禮郎贊賜胙衆官再拜訖禮直官引三
獻司徒太常卿詣瘞坎位南向立定禮直官贊可瘞禮
畢出禮直官引監祭監禮太祝齋郎至北牖下南向立
定奉禮贊再拜皆再拜訖出

推行告廟儀

如受尊號上太皇太后皇太后冊寶冊立
皇后皇太子北國家大典禮皆告于宗廟

前期二日太廟令掃除内外翰林國史院學士撰寫祝

文前一日告官等致齋一日其日告官等各服紫服奉
祝版進請御署訖差控鶴用紅羅鈎金素搗昇覆以黃
羅帕并奉御香御酒如常儀迎至祀所齋宿告日質明
前三刻禮直官引太廟令率其屬入廟殿開室陳設如
儀禮直官引告官等各服紫服以次入就位東向立定
禮直官稍前贊曰有司謹具請行事贊者曰再拜在位
者皆再拜禮直官先引執事者各就位次引告官詣盥
洗爵洗位北向立播笏盥手帨手洗爵拭爵訖執笏請
詣酒尊所播笏執爵司尊者舉巵良醞今酌酒以爵授
奉爵官執笏詣太祖室再拜執事者奉香告官播笏跪
三上香執爵三祭酒以虛爵授奉爵官執笏俛伏興舉

祝官搢笏跪對舉祝讀祝官跪讀祝文訖奠祝於案執笏俛伏興禮直官贊告官再拜每室並如上儀告畢引告官以下降復再拜訖詣望座燔祝再拜半燎告官以下皆退

皇明

太祖吳元年春正月乙亥即位祭告天地于鍾山之陽

洪武元年幸中都祭告天地

成祖永樂六年定北狩儀注車駕將發奏告天地社

稷太廟孝陵及大江旗纛等神祇祭于承天門

其經過處所滁州遣官祭滁陽王泗州遣官祭祖陵

鳳陽祭皇陵祭淮關里遣官祭先師孔子望祭泰

山沿途古先聖王忠臣烈士祠墳禮部預期奏聞遣官

致祭將至北京境上設壇祭北京山川等神 車駕至
北京奏告 天地祭告境內山川等神 二十二年上
尊謚前一日遣官祭告天地 宗廟社稷如常儀至
癸卯前三日遣官告祭期同上

武宗正德十三年 太皇太后王氏將祔葬 上詣天壽
山祭告 六陵

世宗嘉靖十五年 上如天壽山奉遷 孝肅 孝穆
孝惠三后神主于 茂陵享殿還告 祖考于內殿
十八年二月十六日 駕幸承天視 顯陵先期祭告
天地 宗廟諸神如永樂儀注四月十五日回京

上親奏謝 皇天于玄極寶殿同日告謝 皇祖太廟

皇考睿宗廟文武官祭服陪拜又遣官分告 北郊

成祖 列聖群廟社稷朝日夕月 天神 地祇太

歲旗纛都城隍等神及 承天門之神回鑾 命禮官

告 太廟及 奉先殿 又親征先期祭告 天地

宗廟 社稷禡祭旗纛所過山川皆行告祭師還奏凱

獻俘于 廟社以露布 詔天下祭儀詳王禮考 二

十年 仁成二廟神主燬于火 九廟皆災奉 列聖

主于景神殿遣大臣入 長陵獻陵告題 仁成二主

奏謝 上帝 二十四年楚世子英翟弑父顯榕 命

公朱希孝祭告 祖廟斬于市焚屍揚灰 三十年仇

鸞令義男時義厚賂俺答縛送叛人蕭芹等三十人致

巡撫史道所道上言 內閣元輔贊翊睿謀戎政大將
功成互市家平時義結信虜酋歸縛兇逆功當首叙本
兵覆議擬上日告報 玄貺 是年朵顏叛夷哈丹兒
陳通事潛道虜入薊塞爲遊卒所獲禮部請告謝靈壇
郊廟行獻俘禮 三十五年趙文華報浙中倭捷以
十二月獻倭俘舉謝玄貺大典 三十七年閏七月西
苑獻嘉禾祭告 太廟

穆宗隆慶二年冊立 東宮前一日遣官祭告 天地
宗廟社稷至日早 上親告 奉先殿 世宗几筵
弘孝殿 神霄殿俱用祝文祭品 六月以陝西地震
命撫臣張祉告祭西嶽華山西鎮吳山之神 三年

三月遣太常寺官祭東嶽泰山之神 八月以洪水爲患 命總督河道都御史翁大立祭大河大濟之神巡撫鳳陽等處侍郎趙孔昭祭大江大淮之神巡撫山東都御史姜廷願祭東嶽泰山東鎮沂山之神巡撫都御史谷中虛祭東海南鎮會稽之神巡撫保定都御史朱大器祭北嶽恒山之神 六年二月初七日 東宮加冠遣大臣一員前期一日具特牲告 廟

今上萬曆二年奏捷儀注 凡宣捷百官稱賀畢本日即遣官祭告 郊 廟行翰林院撰文太常寺辦祭品中捷以下不行祭告 二十七年閏四月禮部接出 聖諭去冬至今亢旱爲災已歷三時河井乾竭二麥枯槁

民無所賴朕日夜焦思動念深爲失德致此你部裡俱具儀遣官祭告天地社稷山川并應祀神祇神廟竭誠祈禱內外大小臣工着令痛加修省各勤職業以回天意毋得徒飾虛文

雜祠

宋

徽宗宣和間加封徽州府烏聊山廣惠王廟隋末盜起郡人汪華有保障功後因立廟祀之

高宗紹興中建東平忠靖王廟于杭州秀義坊以祀張巡巡故有廟在汴南渡初凡汴之有廟者皆得從祀于杭因祀巡於此又黎州郡守邵溥重新諸葛武侯廟榜

曰天威又作二室于左右左塑唐肅宗像右塑唐李德裕像二人皆鎮巴蜀能使吐番無侵者 又勅建吳玠廟于西蜀仙人關扁曰忠烈 又賜德安知府陳規廟額曰賢守追封忠利侯以規能禦虜保城也 廣濟廟在茅山前有龍池昔陶隱居養龍于此歲旱禱雨輒應時勅封敷澤廣惠侯 建安縣龍焙地主封爲忠應侯累加效靈潤物廣祐侯進封世濟公夫人范氏封協濟夫人地主姓張名庭輝僞閩時人歲修茶貢祈禱多驗詔賜北洛里神廟爲昭福封忠應侯詔詞有曰旱潦病吾民而爾陰功弭其災寇賊擾吾民而爾神力銷其變

郭將軍廟

賜額爲威鎮廟累封廣澤孚惠忠應侯

威濟祠金人渝盟李寶臣自海道禦之至石白山禱
焉因風縱火焚虜舟虜大敗事聞詔封祐順侯立廟于
楚州 威遠侯廟祀楊氏祖時封威遠侯淳熙間加號
英濟 古田縣羊角龍王廟十四年賜爲靈淵廟封靈
濟侯 十五年密州觀察使張淵奉詔統禁旅三千討
江廣亂寇以保汀漳有功于民次年知縣陳致一爲立
張都統祠 福頂山神十九年封爲普濟侯至二十九
年加威顯乾道三年加靈應 二十二年重新邵武縣
歐陽太守惠應廟太守名祐仕隋爲泉州守聞隋鼎既
遷挈家溺死 禮澤廟在尤溪縣瞰虎跳潭二十二年
旱縣令范周翰禱之響應狀其事以聞賜今額 魚溪

虞雄廟二十六年賜爲昭應廟乾道二年加封惠濟咸
淳二年改封德顯公 閩清縣梅川侯陳氏之神三十
年封爲昭顯侯 是年又封陳氏之神爲英惠靈顯侯
建陽縣威惠侯三十年進封爲顯濟靈應忠祐威德
王夫人黃氏十年封慈懿夫人又加號幽贊三子亦各
加號協義侯曰廣利協信侯曰廣澤協濟侯曰廣應按
神名陳湜爲邑錄事以直方清幹爲已任子三人俱以
行義稱唐貞元中父子以讒同時遇害投於溪潮流而
上數十里邑人收而瘞之立廟以祀 鎮閩王廟三十
一年以膠西之役禱于神戰克捷乃加封英護夫人封
靈左封靈應廣惠侯加協威右封顯應嘉澤侯加翊

忠

孝宗隆興元年尊上建寧府城隍惠寧侯加號爲福應張

刺史昭應侯加號靈貺陸刺史嘉德侯加號顯應 乾

道中建岳飛廟于邠州賜額曰忠烈羅汝楫子愿拜飛

淳熙中詔建岳飛廟于安陸州稱忠烈岳武穆公祠

史即智果院立少保岳武穆公廟賜額褒忠又立忠祐

廟于公故宅旁有銀瓶娘子廟以飛幼女抱銀瓶赴井

死也後嘉靖中追封岳飛爲鄂王又湯陰縣亦建廟

張相公廟後漢張平子祠也水旱有禱必應十六年勅

賜賢惠慶元四年封昭應侯

寧宗慶元六年靈顯忠惠公廟加封爲靈祐善應王

嘉泰二年

加號廣濟開禧三年復加號昭惠淳祐
八年更封靈祐福應威濟信順王

嘉泰三年賜

福州通應廟額曰永惠 開禧時和州守臣周虎有却

敵保城功時人比之張巡建廟以祀之淳祐七年賜額

曰忠烈 嘉定中太平守建虞允文祠于廣濟寺賢祐

間郡人請別立廟江上賜額曰英烈 又白知微以安

丙平吳曦有功請爲立廟曰安公祠 又丁焞帥興元

請建張虞二相祠祀張浚虞允文 閩縣令林浦上唐

人有捍災禦患功封廣威通濟王廟 樂山神祠在永

春縣泉州旱郡守蔡襄禱之其雨如注襄以狀聞封爲

善利王尋加號顯濟廟從神曰陳益累封仁福王黃志

累封輔國忠惠侯 又封秀水順濟龍王廟爲靈澤侯

又勅封陳蘇爲英惠王 崇貺廟在房縣西貺本州人封額爲顯應

理宗寶慶初龍州知州洪咨夔毀鄧艾廟爲諸葛亮廟告其民曰毋事仇讎而忘父母 紹定初汀州招捕使陳

韓郡守李華權郡王杆皆有平寇保土功立三賢祠以祀之 古田縣黃師蓋紹定六年封爲靈祐侯廟爲顯

應廟

崇安縣冲妙真君端平元年進封爲協濟侯嘉

熙二年加號妙感

真君名字
秦時人

靈應廟在古田縣有祈

輒應端平三年令傳康狀其事于朝賜額爲靈應淳祐

元年封道愛侯後復加孚惠 永福縣神長者二郎嘉

熙二年封爲廣靈將軍次四郎爲助聖將軍四年長進

封協忠侯次進封助順侯 古田縣陳昌女淳祐間封

爲崇福昭惠慈濟夫人賜廟額爲順懿 淳祐時建嚴

子陵祠于富陽縣東觀山建諸葛孔明祠于武岡州

六年建將樂縣穆肅廟額曰顯惠肅乃隋臣義不事唐

投水而死 福清縣神陳姓者能禁虎爲暴淳祐中封

顯濟靈祐侯勅賜廟額爲孚應 懷安縣張德清廟淳

祐五年封爲慈濟侯賜廟額曰善應 錢塘令朱蹕及

尉曹將金勝祝威淳祐十年立廟賜額曰靈衛 閩縣

顯應廟淳祐十一年賜額曰靈顯神乃劉氏兄弟三人

行全德全待全也禦黃巢之亂保閩大有功焉 寶祐

時泰寧州尹勗立梅仙祠祀梅福以福避王莽隱居于

此後不知所終人傳仙去故稱仙立祠 閩縣陳礪開
慶元年封爲仁濟侯弟巖爲惠濟侯祠始創于蘆川嘉
祐七年春一夕雷雨大作神之香火遷于飲食山之西
麓開禧二年蝗嘉定二年水十二年雨雹十四年秋旱
且疫禱皆著靈響寶慶元年賜額曰顯應開慶中加封
如今稱 景定三年追封張憲烈文侯立祠東山衙口
墓所祀之

度宗咸淳中賜播州武翼大夫楊燦廟額曰忠烈武功大
夫楊炆廟額曰忠顯燦平吳曦有功炆乃燦子也 連
江靈顯廟神黃蓋咸淳二年封爲福惠侯 林俊廟咸
淳七年封爲福恩侯子術爲協惠侯

恭帝德祐初知潭州向士璧禦元兵有功詔立廟祀之

又賜襄陽諸葛亮廟名曰英惠加號仁濟 賜武昌府

三公廟額曰普應三公者伍子胥范蠡伏波將軍也

建宗協廟于建昌府以祀唐忠臣張巡

元至正七年建昌人章文泰復

建東平王廟以祀之

封李衛公祠爲輔世靈祐王元加忠顯威

烈王賜廟額曰仁濟

賜孝感縣張汴廟額曰忠烈以

汴與張巡同死睢陽也

建周先王祠于漳州府以祀

唐周匡物

建周公廟于橫山賜額曰仁濟周公者吳

周凱也嘗導三江注之海變旁邑斥鹵爲甘泉故沒而

民祀之

靈著廟祀劉太尉死而爲神德祐間虜圍城

官軍呼其名射虜輒中事聞賜廟額靈著

遼景宗保寧三年十月以黑白羊祀神 七年五月祭神姑
聖宗統和四年十一月祭麋鹿神 十六年五月祭白馬
神

金世宗大定二十七年正月尚書省言鄭州河陰縣聖后
廟前代河水爲患屢禱有應嘗加封號廟額今因祈禱
河遂安流乞加褒贈上從其請特加號曰昭應順濟聖
后廟曰靈德善利之廟

元

世祖至元五年正月上都建城隍廟 九年遣使持香楮
祀五臺興國寺 十五年勅以春秋仲月上戊日祭武
成王 正月封磁州神崔府君爲齊聖廣祐王按元好

問廟記曰唐崔子玉府君祠在所有之或謂之亞嶽或謂之顯應王者皆莫知所從來府君定平人太宗時爲長子令有惠愛之風本道採訪使與長子尉劉內行弗脩且有賊賊之鄙時縣有虎害府君謂二人者宜當之已而果然及一孝子爲所食乃以牒攝虎至使服罪一縣以爲神而廟事之世所傳蓋如此廟之在陽平者有年矣貞祐之兵燒毀幾盡東平副元帥趙侯爲完復之是年七月建漢祖天師正一祠於京城 八月制封泉州神女號護國明著靈惠協正善慶顯濟天妃 二十五年詔加封南海明著天妃爲廣祐明著天妃 二十八年太史院靈臺上修祀事三晝夜

成宗大德三年二月加解州鹽池神惠康王曰廣濟貧寶
曰永澤泉州海神曰護國庇民明著天妃浙西鹽官州
海神曰靈感弘祐公 又加吳大夫伍員曰忠孝威惠
顯聖王 七年加封真武爲元聖仁威玄天上帝

仁宗延祐初至衛輝經比干墓顧左右曰紂內荒干邑毒
痛四海比干諫紂剖其心遂失天下令祀于墓爲後世
勸 三年四月勅衛輝昌平守臣修殿比干墓唐狄仁
傑祠歲時祭祀 五年七月加封三閭大夫屈原爲忠
節清烈公 七年蒲田縣建義勇武安關王祠于永塘
鄉

英宗至治元年祭通甲神于香山 二年閏三月追封漢

諸葛忠武侯爲威烈忠武顯靈仁濟王 三年

時泰定未改元

祭遁甲五福神

泰定帝泰定元年勅封解州鹽池神曰靈富公 加封廣

德路祠山神張真君曰普濟寧國路廣思王曰福祐

二年遣使祀海神天妃 又遣使祀宅神于北郊行幄

三年遣使分祀京城寺觀 又遣使祀解州鹽池神

四年遣使祀海神天妃

文宗天曆元年加封漢關羽爲顯靈威勇武安英濟王遣

使祀其廟 二年祭遁甲神於南屏山及大都西山

又加封大都城隍神爲護國保寧王夫人爲護國保寧

王妃 又加封天妃爲護國庇民廣濟福惠明著天妃

賜廟額曰靈應遣使致祭 至順元年封蒙古巫者所
奉神爲靈應昭應護國忠順王號其廟曰靈祐 又遣
使代祀護國庇民廣濟福惠明著天妃 是年二月加
封秦蜀郡太守李冰爲聖德英惠王其二郎神爲英烈
昭惠靈顯仁祐王李冰爲蜀郡太守鑿離堆以灌漑諸
郡沃野千里而無水害蜀郡號爲陸
海人咸 三年太常博士王瓚言諸路請加封神廟濫
及淫祠按禮經以勞定國以死勤事能禦大災能捍大
患則祀之其非祀典之神自後不許制曰可

順帝至元元年五月改封徽州土神汪華爲昭宗廣仁武
烈靈顯王 二年以海運至京遣官致祭天妃 三年
封晉郭璞爲靈應侯周處爲英義武惠正應王謚唐杜

甫爲文貞 是年又加封文始尹真人爲無上太初博
文文始真君徐甲爲垂玄感聖慈化應御真君庚桑子
洞靈感化超蹈渾然真君文子通玄光暢升元敏誘真
君列子冲虛至德遁世遊樂真君莊子南華至極雄文
弘道真君 五年加封瀏陽州道吾山龍神爲崇惠昭
應靈顯廣濟侯 六年七月詔封殷微子仁靖公箕子
仁獻公加封比干仁顯忠烈公 九月加封漢張飛武
義忠顯英烈靈惠助順王 徐州牧董恩建呂梁洪廟
以祀漢壽亭侯關羽唐鄂國公尉遲敬德以二公于徐
州皆有遺蹟 建金牙廟于梧州府祀唐尉遲敬德
建諸葛亮祠 又建馬超祠于扶風 九年詔加封天

妃父種德積慶侯母育聖顯慶夫人 十四年詔加號
海神爲輔國護聖庇民廣濟福惠明著天妃 順濟廟
祀浙江潮神以祈禱感應特加忠靖 五龍靈濟廟第
一位龍王加封東靈侯第二位龍王加封西定侯第三
位龍王加封中靜侯第四位龍王加封南平侯第五位
龍王加封北寧侯 至道觀冲妙真人在合州赤山縣
以祈禱感應加封冲妙靈應真人 靈威廟善利侯在
漳州府中江縣以祈禱感應封爲善利敷濟侯

皇明

太祖都金陵卽都城中建十四廟 一北極真武廟以歲

季春秋祭

三月三日
九月九日

一道林真覺普濟禪師廟

御寶

廟以歲季春祭

三月十日

一天妃廟以歲孟春祭

一

都城隍廟以歲仲秋祭

八月祭帝王後一日祭

一祠山廣惠張

王渤廟以歲仲春祭

二月十日

一五顯靈官廟以歲孟

夏季秋祭

以上俱遣南京太常寺官主祭

一太倉

廟仲春祭戶部官祭之

一馬祖先牧太僕廟洪武二

年建祭馬祖先牧馬步馬社之神初命築壇於後湖

祀馬祖諸神禮官奏言周官牧人掌天馬之屬春祭馬

祖夏祭牧人冬祭馬步馬祖天駟星也孝經說云房爲

龍馬先牧始養者其人未聞馬社始乘馬者世本曰相

土作乘馬馬步謂神之災害於馬者隋用周制祭以四

仲之月唐宋因之今擬春秋二仲月甲戌庚日爲宜於

是官行禮爲壇四壇用羊一豕一幣一其色白邊豆
各四簋豆登象尊壺尊各一樂用時樂獻官齋戒公服
行三獻禮祝文曰維神始於天地之初而司馬於世牧
養蕃息馭而乘之閑既得所歷代興邦戡定禍亂咸賴
戎馬民人是安 朕自起義以來多資於馬摧堅破敵
大有功焉稽古按儀載崇明享爰伸報本以昭神功謹
以制幣牲齊式陳明薦尚享自後定以春秋仲月十五
日遣兵部官祭歲以爲常 一漢秣陵尉蔣忠烈公子
文廟 一漢前將軍漢壽亭侯廟國初稱漢前將軍壽亭侯嘉靖十年太常
卿黃芳奏改稱漢前將軍漢壽亭侯 一晉成陽王忠肅公壺廟并祀二
子卞瞻卞豎 已上五廟俱四孟朔日歲暮除日 一

宋濟陽曹武惠王彬廟

遺應天府官祭惟蔣于四月二十六日加一祭

一南

唐劉忠肅仁瞻廟

一元衛國忠肅公福壽廟

已上

俱以四孟朔日及歲除俱應天府官主祭

又蔣廟有

孟夏之祭

按太常志謂四月二十六日王之生辰則此祭疑即此也國初封忠烈永樂八年始加

封忠烈武順昭靈嘉祐王云

關廟有仲夏太常之祭諸廟皆少牢

真武寶誌素羞祝文並稱

皇帝遣官云

和州城隍

洪武己酉春正月

勅封爲承天監國司民靈護王仍

頒降神像冕服九旒九章青衣緋蔽膝緋白帶緋襪履

先是

太祖以兵駐和及渡江神皆著異至是特

賜

封號

是月命有司凡祀典神祇依時致祭其不在

祀典而嘗有功德於民者即不祭存其祀宇禁人拆毀

是年 詔封天下城隍之神在應天府者以帝在開

封臨濠太平府和滁二州者以王在各府州縣者以公

以侯以伯 是年特勅郡邑里社各設無祀鬼神壇俗

稱孤魂壇以三月清明七月十五十月初一日祭以城

隍神主之鑒察善惡

旗

旗手衛指揮祭神旗附

國家旗

歲之 內府每歲仲秋祭山川日遣旗手衛指揮祭於

山川壇內之旗纛廟霜降日又祭于教場至歲暮享

太廟日又祭于 承天門外永樂後別有神旗之祭專

祭火雷之神每月朔望神機營提督官設祭于教場內

二十三年 詔陝西乾州立唐忠臣渾瑊祠先是乾

州同知史孟通上言渾瑊在唐德宗時涇原兵變瑊獨

引兵苦戰百計御敵卒能保乘輿全城郭功載唐史今其祠廟在而祀事有缺甚非報功勸忠之義宜令有司每歲春秋致祭故有是命

祀典所載及修建遣祭祠廟具列於後

北嶽廟在真定府曲陽縣治西距恒山百餘里祀北嶽東嶽廟在泰安州治西洪武三年詔去封號稱爲

東嶽泰山之神有司春秋致祭東海廟在萊州府城

西十八里南鎮廟在紹興府南十三里祀會稽山神

唐元皆封爵號本朝革去載在祀典敬誠夫人廟

在高州府電白縣東北陳高州太守馮寶妻洗氏有保境討夷功封譙國夫人本朝洪武初封爲高涼郡太

人歲以仲冬二十四日祭之 江瀆廟在成都府城內

西南祀西瀆大江之神 南海廟在廣州府 本朝洪

武初盡去舊號止稱南海之神 西嶽廟在西安府華

陰縣東五里 中鎮廟在平陽府祀霍山之神 西海

廟 河瀆廟三廟 北鎮廟在遼東祀醫巫閭山之神

洪武中重修南嶽廟在衡州府祝融峰下祀衡山之神

淮瀆廟在南陽府相柏山左 本朝稱爲東瀆大淮

之神至宣德二年修 開平忠武王廟在長安縣治西

本朝常遇春以開陝功 勅有司立廟歲時致祭 岳

飛廟在彰德府湯陰縣治西南 本朝建賜額精忠

勅有司歲時致祭 顯應廟在辰州府祀明山之神

張飛廟在沅州城南五十里 勅有司春秋祭 昭勇

廟在興國州東六十里富池口祀吳將軍甘寧 本朝

改號吳將軍甘公之神春秋祀之 黃陵廟在湘陰縣

北四十里 本朝命有司每歲六月六日致祭 天妃

廟在興化府湄川嶼妃莆人宋都巡檢林愿之女洪武

永樂中兩加封號有司春秋祭之 靈源弘濟廟河平

神廟龍神廟俱在徐州歲時祭之 陽山廟在常德府

治東北 本朝命有司歲時致祭 潘將軍廟在龍陽

縣西祀吳將軍潘濬 本朝命有司歲時致祭 仰山

祠在宜春縣 本朝封大仰山之神春秋祀之 子胥

廟在杭州府吳山伍員伏劍死吳王盛以鸛夷之革浮

之於江吳人立祠于胥山祀之唐乾寧中付爲吳安王
本朝命有司歲時致祭 三仙廟在鎮江府丹陽縣
四十里下有孫鍾墓丘灌鍾井即孫權祖業種瓜有
三士指以葬地化爲三鶴飛去鍾卒葬其地後人立廟
祀之歲時致祭 水府廟在鎮江府金山寺內五代史
楊氏據江南封馬當爲上水府采石爲中水府金山爲
下水府有司歲時致祭 馬砲泉之神在平陽府令有
司春秋致祭 靈山祠在瓊州府靈山其所祀之神有
六曰靈山曰香山曰瓊崖曰通濟曰定邊曰班師洪武
中命有司歲以三月九日祭之 高山廟在瓊州府昆
耶山祀其山神洪武中 命有司歲祭 豐山廟在滁

州山頂舊名豐表洪武初改豐山之神六月六日與柏
子潭之神合祭 開平忠武王朝在薊州府治南洪武
中 勅建祀開平王常遇春以其克城有功 靈潛廟
在慶遠府九龍 本朝封爲九龍之神 肇山神廟
在平陽府遼州城西二里 本朝錫號肇山之神顯功
祠在山海關祀中山武寧王徐達 祝融廟在平陽府
遼州城西二里本朝錫號祝融氏之神 烏龍廟在嚴
州府北二里累著靈驗歷代褒封王爵 本朝稱烏龍
山之神有司歲以三月三日祀 先軫廟在平陽府遼
州城南二里 本朝錫號晉人先軫之神 衛源廟在
衛輝府 門泉上 本朝以水之本名稱之每歲四月

八日有司祭 又黑龍神廟山西太原府治東北廟祀
本朝常遇春又開平忠武王廟在衢州府治北洪武
初建遇春有功于衢故也 崇烈廟在九江府東南祀
元江州總管李黼 本朝洪武中重建春秋祭之 越
國公祠在金華府洪武初祀忠臣胡大海近以按察副
使陶成配享 廣州府天妃廟 真武靈應祠 忠義
祠祀關敏俱洪武初建 霍去病廟在臨洮府五眼泉
側 本朝洪武初建 壽亭侯祠在臨洮府城東二里
本朝洪武末重修 彭惠王廟在澧州西十里 本
朝爲李彭思王廟祀以冬至日 洞庭廟在長沙府嘉
石山洪武初建封洞庭湖龍神 命有司每歲四月八

日致祭 馬侯廟在承天府西五里祀馬援洪武中重建春秋致祭 壽亭侯廟在畢節衛城內東洪武二十三年指揮柳楫建 惠濟廟在畢節衛城內東北洪武二十八年柳楫建 汝州漢壽亭侯廟有三一在郊縣城內洪武中建一在魯山縣西北洪武末重建一在州城內正統初建 瓊州府峻靈王廟在峻靈山祀山之神 本朝洪武二十年重修 黑水將軍廟在鳳陽府城臨淮門外宋嘉定間郡守柴將軍鑄鐵像刻云濠州之北淮河之邊于汝鎮守億千萬年洪武間重建 永南衛關王廟衛城南門外洪武二十八年建 龍神廟衛城南二里洪武二十九年建 鄖陽府關王廟在府

景皇帝景泰三年重建 虞允文祠於采石山下宋紹興
末金主亮入寇欲由采石渡江允文督統制官時俊等
以海鯨船逆擊之金人大敗不能濟嘉定間郡守滕宗
卿爲建祠寶祐間郡人請立廟江上賜額英烈

英宗天順八年建瑞州府關王廟在筠陽書院左祀義勇
武安王

孝宗弘治間重建栗王祠在夏邑縣城北祀漢耿夔 顯
惠廟在東阿縣西六十里安平鎮五年建祀河神

武宗正德間徙建協忠廟於歸德府城隍廟西祀唐張巡
許遠以雷萬春南霽雲姚閭賈賁祔焉 瑞州府岳王
廟在新昌縣東門內三年邑令熊紀以王有功茲邑立

廟以祀

世宗嘉靖初改袁州府忠烈報功二祠 忠烈祠在府治北舊爲東嶽廟今改祠祀岳武穆及其將王貴 報功祠在府治南舊爲龍王廟今改祠祀唐刺史李將順 倪文毅在禮部上正祀典疏曰釋迦牟尼文佛三清三境天尊謹按傳記西方佛國曰天竺天竺有五中天竺乃釋迦所生之地後漢明帝時其法始入中國宗其教者遂以釋迦爲師其曰三世佛者則以釋迦之本性爲法身德業爲報身并其真身而爲三其實本止一人耳乃今分爲三像而並列之失其旨矣三代之時中國未有佛也明帝時始有佛法其後亂亡相繼運祚不長宋

齊梁陳以下事佛漸謹年代尤促惟梁武帝捨身施佛
其後餓死臺城事佛求福乃更得禍由此觀之佛不足
事亦可知矣至於道家以老子爲師其所謂三清者蓋
倣釋氏三身而爲之尤爲謬妄宋儒朱熹有曰王清元
始天尊既非老子之法身上清太上老君蓋倣釋氏之
失而又失之者也况莊子明言老聃之死則聃亦人鬼
耳豈可僭居昊天上帝之上哉由是言之三清三境天
尊實無所據况躬親祠醮傾心崇奉如宋徽宗者可謂
至矣卒之陷身虜庭覆亡宗社千載之下可爲明戒但
緣異端佛老之徒轉相模倣惑世誣民歷代因之莫之
有廢是以逾年以來凡遇萬壽千秋等節奉欽依

修建吉祥好事或遇喪禮七七修建薦揚好事俱先期
一日遣官詣大興隆寺祭告釋迦牟尼文佛朝天宮祭
告三清三境天尊此皆因襲而行不合祀典今議齋醮
既合停止其前項祭告俱各罷免北極中天星主紫微
大帝謹按象緯書有曰北極五星在紫微垣中一名天
極一名北辰其北第五星名天樞蓋極星之在紫微垣
萬星所宗七曜三垣二十八宿衆星所拱爲天文之正
中又曰紫微大帝之座天子之常居也即今朝廷官殿
所在乃其像焉 國朝正統初年建紫微殿一所在於
大德觀之東設立大帝之像每遇 萬壽聖節正旦冬
至俱遣大臣一員祭告今議得日月星辰並曜于天故

古有大明祭日夜明祭月幽宗祭星之文 祖宗以來
每歲南郊大祀內壇已有星辰壇合祭之禮今乃像之
如人稱之爲帝以極星之正祠于異端之宮稽之祀典
誠無所據所有前項祭祀伏乞罷免九天應元雷聲普
化天尊謹按傳記有曰凡陰氣凝聚陽氣在內而不得
出則奮擊而爲雷霆非如異端所謂龍車石斧鬼鼓火
鞭恠誕之說也雷聲普化天尊者道家以爲玉霄一府
總司五雷而雷部諸神皆其所王又托以六月二十四
日爲天尊示現之日故 朝廷遂以是日遣官詣大德
顯靈宮致祭今議得風雲雷雨皆陰陽之妙用鬼神之
威德 祖宗以來每歲南郊大祀外壇已有合祭之禮

而八月望後山川壇復有秋報之祭況自二月發聲之後無非雷霆奮震之日顧乃定於六月二十四日於義何取至於像說名稱禮亦無據所有祭告伏乞罷免梓童帝君謹按圖志英顯王廟在劍州即梓童神姓張諱亞子其先越雋人因報母讐徙居劍州之七曲山仕晉戰沒人爲立廟唐玄宗西狩追封左丞僖宗入蜀封濟順王宋咸平中改封英顯又按文昌六星在北斗魁前爲天之六府道家謂上帝命梓童神掌文昌府事及人間祿籍故元加號爲輔元開化文昌司祿宏仁帝君而天下學校亦多立祠以祀之京師之廟在北安門外景泰五年間闢而新之勅賜文昌宮額歲以二月初三

日爲帝君誕生之辰遣官致祭今議得道家謂梓童以孝德忠仁顯靈於蜀廟食其地於禮爲宜祠之京師不合祀典至於文昌之星與梓童無干今乃合而爲一誠出傳會所有前項祭祀伏乞罷免祖師三天扶教輔玄大法師真君謹按傳記張道陵漢光武十年生於吳之天目山善以符水治病桓帝永壽元年於靈峰白日上升百二十歲唐天寶七年冊贈天師中和四年封三天扶教大法師宋熙寧中加封三天扶教輔玄大法師大觀二年冊號正一靖真君子孫歷代相傳皆有封號逮入國朝仍令傳襲正一嗣教真人之封秩正二品歲以正月十五日爲祖師示現之辰遣官詣大德靈顯宮

告祭又按宋邵伯溫聞見錄建安二十年曹操破張魯
定漢中魯祖陵順帝時客蜀學道鳴鶴山中造作符書
惑百姓從受其教者輒出五斗米時謂之五斗米賊陵
子衡衡子魯以法相授受自號師君其衆曰鬼卒曰祭
酒大抵與黃巾相類朝廷不能討就拜張魯漢寧大守
鎮夷中觀此則陵本非異人而道家祖陵爲天師者特
因天寶詔稱漢天師而然爾今議得正月十五日乃其
生辰自宜其子孫祭于其家所有前項祭祀伏乞罷免
大小青龍之神謹按碑記昔有僧名盧自江南來寓西
山之屍陀林秘魔巖一日二童子來拜于前盧納之齋
新供奉雖寒暑無怠時又旱不雨二童白於盧能限兩

期言訖即委身龍潭須臾化青龍一大一小至期果得
甘雨事聞賜盧師號曰感應禪師建寺設像立碑以記
其事又別設祠于龍潭之上春秋遣官祭龍神 國朝

宣德中 勅建大圓通寺二青龍出現禱之有應於是
加以封號至今春秋二時遣順天府官致祭及遇歲旱
遣官祭告蓋因舊龍能致雲雨故 累朝崇奉如此雖

然稱二青龍其實蛇也蛇有神蛇其名曰輪亦能致雨
今此二蛇西山寺院處處有之略無靈異近者京師連
年亢旱累累祭告祈禱杳無應驗則此亦非輪蛇乃凡
蛇耳蓋妖由人興又自哀息無足崇矣昔宋祥符中天
慶觀有蛇極怪異人以爲龍孔道輔以手板擊其首死

之其患遂息程明道爲上元主簿茅山池有小青龍如
蜥蜴崇奉以爲神物明道捕而脯之使人不惑後亦不
聞如何則此二蛇之性誕正此類所有前項春秋祭告
之禮伏乞罷免東嶽泰山之神謹按圖志東嶽魯之泰
山今在山東濟南府泰安州山下有廟自黃帝以來封
禪者七十二君唐宋元皆加封號曰王曰帝若祀神鬼
國朝洪武三年詔去封號稱爲東嶽泰山之神有司
春秋致祭有事則遣廷臣祭告今京師朝陽門外亦
有東嶽廟蓋自元延祐中玄教大宗師張留孫買地爲
宮奉祀東嶽齊天祖聖帝國朝仍不廢歲以三月二
十八日及萬壽聖節遣官致祭夫嶽鎮海瀆以山川

靈氣有發生潤澤之功故歷代祀之泰山在魯封內歲時已有常祭况每歲南郊大祀壇八月山川壇俱有合祀之禮所據前項祭告稽之祀典煩瀆無據合當罷免北極佑聖真君謹按傳記蓋真武神也真武本玄武宋真宗尚道教避聖祖諱改玄爲真玄龜也武蛇也本北方玄武七宿虛危星形似之故因而名後乃以玄武爲真武而作龜蛇於下靖康初詔加號助順助聖真武靈應真君及考圖志乃云真武爲靜樂國王太子也生而神靈長而勇猛志除邪魔遇紫虛玄君授以道秘東遊遇天神授以寶劍入武當山修煉功成白日飛升奉上帝命往鎮北方披頭跣足皂纁玄旗統攝玄武之位則

此道家傳會之說殊爲誕妄再考國朝御製碑文太祖高皇帝平定天下兵戈所向神陰佑爲多及定鼎金陵乃於鷄鳴山建廟以崇祀載在祀典太宗文皇帝肅靖內難以神有顯相又於京城良隅并武當山各重建廟宇而兩京歲時春秋及京師每月朔望各遣官致祭武當山則命內外官員專一在彼提督列聖崇奉之意可謂至矣憲宗純皇帝在位常範金爲像遣內官陳善齋往武當山安奉豈期陳善援引左道之人鄧常恩等上則熒惑聖聰糜費內帑下則搔擾道路虐害生民且又奏請重修京師廟宇改號靈明顯佑宮曰居其間引進邪術遂使香火之地幾爲奸盜之區固

非朝廷崇奉之本意使玄武有神亦豈其所樂聞哉
今議得神既有力於國則累朝崇奉之禮固不可廢
但本以一人而一歲之間兩京俱有春秋之祭京師復
有朔望祭告過於煩瀆合無照依洪武年間以來例應
每年三月初三日九月初九日各用素羞遣太常寺官
祭祀其餘祭禮竝行停止其武當山神像之類頻年齋
送不無太繁況已有內外官員領勅在彼一應供奉
之物自合責令各官嚴加整辦量為裁革減省崇恩真
君隆恩真君謹按道家之言有曰崇恩真君姓薩氏諱
守堅西蜀人在宋徽宗時嘗從虛靖天師張繼先及王
侍宸林靈素傳學道法果有靈驗而隆恩真君則王樞

火府天將王靈官也又嘗從薩真君傳授符法 國朝

永樂中有杭州道士周思得以靈官之法顯於京師附
體降神禱之有應乃於禁城之西建天將廟及祖師殿
宣德中改廟爲火德觀封薩真人爲崇恩真君王靈官
爲隆恩真君又建一殿崇奉二真君左曰崇恩殿成化
初年改觀曰官加顯靈二字通年四季換袍服三年一
小焚化十年一大焚化又復易以新製珠玉綿綺所費
不貲每歲 萬壽聖節正旦冬至及二真君示現之日
皆遣官致祭其崇奉可謂至矣今就其言議之薩真人
之法皆宋徽宗時 靈素輩之所傳一時傳會之說淺
謬如此本無可信況近年附體降神者乃 欽發充軍

顧珽顧倫之父子其爲鄙褻尤甚往往禱雨祈晴杳無
應驗則其恠誕可知矣但經累朝創建一時難便廢
毀所有前項祭祀俱各罷免其四時袍服宜令本宮住
持并庫役人等於每年應換之日仍會同道錄司掌印
官照舊依期更換如法收貯不必焚化永爲定例金闕
上帝謹按大明一統志福州府閩縣南舊有洪恩靈濟
宮一所祀二徐真人即今之金闕王闕二真人也真人
五代時徐溫子曰知證封江王知諤封饒王常提兵平
福建父老戴之圖像以祀宋賜今額又考之御製碑
文云太宗文皇帝臨御之十有五年適遇疾弗豫百
藥罔效或有言神靈驗者禱之輒應脫然平復於是大

新闢地廟宇 命有司春秋致祭歲時是衣給戶灑掃
又於京師立廟以祀之加封金闕真人十六年又加封
金闕真君玉闕真君 賜廟額名洪恩靈濟宮正統初
年重新宮宇進號金闕崇福真君玉闕隆福真君成化
二十二年重加尊號伯曰九天主闕總督鬼神洪恩靈
濟慈惠高明上帝仲曰九天主闕總督鬼神洪恩靈濟
仁惠弘靖上帝邇年以來每年朔望并 萬壽聖節正
旦冬至及二真君誕辰俱有祭祀遣官行禮及時食獻
新至今不缺四時已有皮弁冠大紅紗羅紵絲織錦雲
龍朝服近又加以平天冠明黃紗羅紵絲衣服夫神之
世系年代可考如此本非有甚異也先年止因有功于

閩廟食一方後以保護 文皇帝聖躬故京師有別廟
之奉祀但本處既有春秋二祭而京師一年之間復有
前項數次祭祀不無煩瀆且惟皇上帝主宰于天而兄
弟竝稱上帝其爲僭擬可知廟之創造既始于閩則神
如有靈固當往來于閩所以福建舊廟祭祀 仍其舊
其京師 聖節并朔望等項祭祀及時食獻新俱乞罷
免仍乞革去帝號照依永樂年間加封事例上稱真君
冠服仍用本等服色所有見在平天冠明黃袍服責付
本宮庫內收貯仍行 內府各該衙門無得再行置造
如此既不失報功之典而祀亦不至於煩瀆矣神父聖
帝神母元君金闕元君王闕元君謹按徐仙直錄及

國朝御製碑文神父神母者自二真君之父母金闕元
君王闕元君者蓋其配也宋理宗朝封父齊王爲忠武
真人母白氏仁壽仙妃配許氏助順仁忠仙妃配陶氏
助善慈懿仙妃 國朝末樂中封父翊亮真人母淑善
仙妃許氏真應仙妃陶氏恭靖仙妃繼又進其父爲真
君成化二十二年神父加封高上神主慈悲聖帝聖母
加封安寧護國恭靖元君金闕妃天房衛保節靖元君
玉闕妃天房衆母顯佑元君每歲 萬壽聖節正旦冬
至俱遣官致祭而金闕玉闕元君又有誕神之祭皆因
二真君一時禱應之功故崇奉如此今議得神父徐溫
乃五代時誤國專權弑主殊無功德祀以報功豈宜濫

及兄父母并妃竝受隆名稱帝君僭擬益甚所有名號
乞照未樂間封者爲正以後加增一切祭祀俱各罷革
京郭城隍之神謹按易坎卦有曰王公設險以守其國
人君者觀坎之象不可陵也故設爲城郭溝池以
守其國以保其民人傳記謂其制自黃帝始歷代建國
必有高城深隍上以保障宗社朝廷下以衛悍百官萬
姓其所繫甚重其爲功不小故國朝之制天下府州
縣皆有城隍廟之祭京都城隍廟舊在順天府之西南
累朝皆加修葺歲以五月十一日爲神之誕辰及
萬壽聖節各遣官致祭夫廟祀城隍之神本非人鬼安
得誕辰可謂謬妄况每歲南郊大祀壇八月山川壇俱

有合祭之禮事體已重此於天下府州縣之祭不同所有前項祭告煩瀆無據俱各罷免奉 聖旨是修建齋醮遣官祭告并東嶽廟真武廟城隍廟靈濟宮祭祀俱照舊二徐真君併父母妻仍舊封號新加上帝等號俱革去冠袍等件該衙門換回焚燬其餘多堆擬行

穆宗隆慶四年七月 詔建河神祠于夏鎮梁山各一

賜名曰洪濟昭靈 命夏鎮間徐州洪主事以春秋致祭從撫臣翁大立請也 六年三月以工部尚書朱衡請 詔祀沿河 勅建水神諸廟

今上萬曆二十二年七月禮部覆奏崇寧宮道士張通原奏漢壽亭侯祠額請名奉 旨祠名與做英烈 十一

月禮部奏延鎮陣亡遊擊史見儒等各祠堂致祭奉
旨祠名都與做愍忠 二十三年禮部奏覆太常寺以
御鍾化民奏于謙建祠春秋二祭奉 旨祠名與做忠
節 二十六年曾如春奏正德中欽天監監候忠臣楊
源應立祠贈謚因賜額曰顯忠

本朝修建祠廟始末未詳者附後備攷

温州府忠烈侯廟祀唐死事人田居邵 仁濟廟祀晉
郡人周凱 忠訓廟祀宋死事人徐震 忠惠廟祀宋
死事臣張理 四廟俱有司歲祭 杭州府伍子胥廟
唐乾寧中封子胥爲吳安王稱大夫伍公之神 本朝
命有司歲時致祭 懷慶府北海廟祀北海之神 濟

瀆廟祀大濟之神 澤州府靈源廟在平南縣南武林鄉祀龍神 本朝重建 延平府威寧廟祀五代時閩將劉瓊旌福廟祀宋將樂令陳攄二廟俱有司春秋致祭 忠顯廟祀宋余望 忠愍廟祀宋趙師檣 襄陽府忠節祠在鳳凰山之陽祀本朝平蠻將軍王忠德 安府淮瀆廟祀大淮之神 河南府中岳廟祀嵩山之神 路安府南山龍泉神廟今稱伏牛山龍泉之神 南山神廟及焦龍神廟俱稱以本名 龍母廟有二一在化州南龍母山之陰一在吳川縣北二里俱 本朝建 交州府青山廟今稱爲青山之神以禱雨輒應故祀之 平陽府狄武襄廟祀宋將狄青廟在汾州 平

陽府平水祠今以本號稱其神 靈威廟在古北口祀
宋楊業 東鎮廟在沂州祀沂山之神 韓蘄王廟在
蘇州府祀宋朝韓世忠 平陽府西海廟在蒲州祀西
海之神 河濱廟在蒲州祀大河之神

續文獻通考卷之一百十終